

Yenling dingq le ngaekgyaeu naeuz: “Cingq dwg la, gou bae yawj heiq seiz, yawjraen gyoengqvunz biujyienj fwngz gaem cieng, menh saenq di he, yawj hwnjbae couh saenzdikdik, lumj yunghrengz dangq-maz, gizsaed dwg ci cieng de aeu caizliuh daegbied guh baenz, yungh di rengz bae saenq couh saenzdikdik. Haemhde boux sijdonz he deng cieng camz haeu bakaek le ci cieng haenx lij saenzdikdik, yenzlaiz dwg cieng heiqduenz. Gyoengqvunz sijdonz mbouj rox, raen bouxgvaig saenq ci cieng haenx saenzdikdik, roxnyinh bouxgvaig gig miz rengz, ndigah lau dangqmaz, couh engqgya simvueng lo. Veiz Cungh, mwngz gangj caen miz dauhleix. Hoeng, gyoengqcaeg vihmaz ce gij baengzcingq neix roengzdaeuj ne?”

Veiz Cungh dingq yenling baenzneix cam, doq dap naeuz: “Aenvih seizde miz vunz sijdonz vuengmuengz buet deuz, gyoengq bouxcaeg caeg ndaej huqgung le, hix siengj deuz vaiq di. Hozgvang gyoengqde hix lau gij vunz sijdonz deuz ok bae bauqanq, ndigah gyoengqde mbouj miz seizgan bae buqvaih gij baengzcingq neix.”

Veiz Cungh menh gangj, yenling menh dingq menh ngaekgyaeu, hoeng yenling lij miz di mbouj miz daej, naeuz: “Heiqngaeuznaeng, bienq naj caeuq yungh cieng heiqduenz, baez yawj caen dwg vunz heiqduenz guh. Hoeng bouxvunz mbouj youq heiqduenz guh hong hix rox bae ra ndaej gij huq neix daeuj a, yienghneix duenhdingh lumj naeuz lij noix di maz.”

Veiz Cungh naeuz: “Yenling



mwngz siengj, huqgung baez daengz Dilinz Yen couh deng caeg, gangj-mingz gyoengqcaeg caeux couh rox huqgung daj gizlawz soengq, gvaq gizlawz, ndigah miz cinjbi bae caeg. Soengq huqgung dwg saeh hung, saeh mimiz, danghnaeuz mbouj deng caeg, lienz yenling mwngz hix mbouj rox, bouxvunz bingzciengz baenzlawz rox? Yenling mwngz lij geiq ndaej lwi, ciuzdingz vih banh gingdenj, vuengz-daeq mingling gak dieg gij heiqduenz mizmingz bae guek henz biujyenj, Dilinz Yen ceiq gyawj Senhlozgoz, gij heiqduenz bae Senhlozgoz biujyenj cingq miz heiqduenz Dilinz Yen ha, gyoengqde biujyenj le riengz sijdonz dauqdaeuj, haengjdingh rox soengq huqgung gienh saeh neix.”

Baezneix yenling couh soengheiq lo: “Baenzneix geij diemj hab hwnj-daeuj, couh caen dwg vunz heiqduenz caeg huqgung bae lo! Hoeng, yienh raeuz gungh miz 5 aen heiqduenz, seizneix hix mbouj rox dwg vunz aen heiqduenz he caez guh roxnaeuz geij aen heiqduenz ndawde mbangj vunz

guh, dwg bouxlawz hix mbouj cingcu. Danghnaeuz baij bing bae gaeb gyoengqde hwnjdaeuj, gyoengqde mbouj nyinhcoih hix mbouj miz yungh ha!”

Veiz Cungh riuha hwnjdaeuj, naeuz: “Yenling ha, sugvah gangj ndaej deng, vunz vih caiz dai, roeg vih gwn mied. Bouxcaeg vih cienzcaiz guh caeg, hix rox aenvih cienzcaiz mued dai, raeuz couh aeu cienzcaiz guh faenzcieng!” Veiz Cungh gangj le couh youq henz rwz yenling simhsimh, yenling hix riuha hwnjdaeuj, naeuz: “Baenz, couh baenzneix guh.”

Ngoenz daihngaih, yenling heuh gyoengq bing bae cienz vah, naeuz gij gingdenj senj guekduh yaek daengz lo, ndaw yienh aeu senj ok 10 boux vunz heiqduenz biujyenj ceiq ndei bae gingsingz biujyenj. Haemhneix youq ndaw yaxmonz biujyenj, byawz bauqmingz camgya, couh ciengj hawj 20 liengx ngaenz, boux deng senj ndaej lij lai hawj ngaenz ciengj dem. Haemhde, couh miz geij aen heiqduenz hauilai vunz daeuj bauqmingz, hoeng geij

aen heiqduenz ndawde lij miz 10 boux vunz mbouj daeuj bauqmingz. Baenz-neix, yenling mingling gyoengq bing riengz 10 boux vunz neix. Ngoenz-laeng, 10 boux caeg huq deng gaeb, huqgung hix ra ndaej dauq lo.

Huqgung ra ndaej dauq le, gyoengqvunz cungj haenh yenling miz maeuz, hoeng yenling riuha hwnjdaeuj, naeuz: “Saeh neix goenglauz dwg Veiz Cungh, gyo ndaej de naeuz hawj gou baenzlawz bae ra bouxguhcaeg.” Vunzlai couh heuh Veiz Cungh daeuj, camcam de yungh aen fap maz.

Veiz Cungh menhmenh gangj ok gij geiqmaeuz de daeuj: Yenzlaiz, ngoenzde de caeuq yenling duenhdingh caeg huqgung dwg vunz heiqduenz, de couh youq henz rwz yenling simh, genyi yenling cienz vah okbae naeuz gij gingdenj senj guekduh aeu vunz heiqduenz bae biujyenj, fanzdwg boux bauqmingz biujyenj moix boux ndaej 20 liengx ngaenz. Gij cienz neix dwg bingzseiz biujyenj 10 doeb, ciuq leix daeuj gangj, vunz heiqduenz wnggai vih gij ngaenz neix daeuj bauqmingz. Hoeng, byawz caeg ndaej huqgung, gyoengqde gizlawz lij yawj ndaej hwnj 20 liengx ngaenz neix dem! Ndigah byawz mbouj daeuj bauqmingz byawz couh deng ngeiz! Baenzneix, couh baiq bing bae riengz 10 boux vunz mbouj daeuj bauqmingz neix, caz gyoengqde baez ndeu. Caen dahraix, gyoengqde couh dwg boux caeg huqgung, ra ndaej bouxcaeg, huqgung hix ra ndaej lo.

Vunzlai dingq Veiz Cungh gangj le, bouxboux haenh de lai geiq lai maeuz. Saeh neix sat, yenling gig baiqfug Veiz Cungh, couh ce de roengzdaeuj guh swwhyaz. (sat)

Duzmeuz Iq Hag Bonjlingx

小猫咪学功夫

□ Vangz Lihoz / 黄利和

Duzmeuz meh miz song duz meuz iq, duz he henj, duz he raiz. Song duz meuz iq gij da lumj doengzlingz nei hung, bwnnyumyum, dwggvaez dangqmaz. Duzmeuz meh maij gyoengqde baenzmaz, ngoenzngoenz ciengq go hawj gyoengqde dingq, daiq gyoengqde okrog bae youz, huq maz ndeigwn cungj ce hawj gyoengqde gwn gong. Baenzneix, song duz meuz iq menhmenh ndang cangq sim vuen dwk majhung lo.

Raen song duz meuz iq ngoenz beij ngoenz majhung, duzmeuz meh doiq gyoengqde naeuz: “Gou son sou bonjlingx ba.” Song duz meuz iq dingq le angqvauvau, diuq hwnjdaeuj heuh: “Ye, dou ndaej hag bonjlingx lo, dou ndaej hag bonjlingx lo.”

Baez daih’it, duzmeuz meh son gyoengqde diuqsang, gyoengqde mbouj rox diuq, duzmeuz meh couh diuq hawj gyoengqde yawj. Seizhaenx, duzmeuz henj doeng yawjyawj sae muenghmuengh, cungj mbouj yunghsim yawj meuzmeh baenzlawz diuq. Hoeng, duzmeuz raiz da caengz ndaej gig hung, baez he hix mbouj yaep dwk yawj daxmeh diuq.

Duzmeuz meh hawj gyoengqde

diuq hwnj aen daengq, duzmeuz henj diuq gong. De mbouj yawj aen daengq miz geijlai sang, couh doq diuq gvaqbae, doeklaeng diuq mbouj hwnj lij deng sieng. Duzmeuz meh naeuz: “Danghnaeuz mwngz yawj cinj aen daengq caiq diuq, couh ndaej lo.” Daengz duzmeuz raiz diuq, de hag gij fuengfap daxmeh diuq, mbat he couh diuq hwnjbae lo. Duzmeuz haenh naeuz: “Mwngz gvai lai lo, hag ndaej caen vaiq.”

Baez daihngaih, duzmeuz meh son gyoengqde bin faex. Duzmeuz meh sien bin hawj gyoengqde yawj, dingjlingz miz duzmbaj mbin gvaq, duzmeuz henj couh buet gvaqbae caeuq duzmbaj guhcaemz. Duzmeuz raiz raen le, doiq duzmeuz henj gangj: “Daegnuengx, mwngz mbouj yunghsim hag, doeklaeng baenzlawz rox bin faex ne?” Duzmeuz henj dingq le, dasang gangj: “Gou coengmingz, bin faex doiq gou gangj gig yungzheih, gou mbouj hag hix rox.” Duzmeuz raiz dingq le cijnde ngauzgyaeu, mbouj dam de, gag bae hag.

Duzmeuz meh son sat, couh hawj songde bin faex. Duzmeuz henj saenqsim nyubnyub, doiq daxmeh



Bya mwn faex loeg ranzvax lengj.

Dunghbingz Cinz Veizez ingj

gangj: “Siuj saeh, yawj gou baenzlawz bin.” Hoeng, ngamq bin hwnj gij ganjfaex couh doek roengzdaeuj lo, caiq bin youh doek roengz, daengx ndang in raeuh. De hozhwnj dwk ngauzngauz diuz rieng naeuz: “Go faex neix luemj lai, ndigah gou bin mbouj hwnjbae.”

Duzmeuz meh naeuz: “Mbouj dwg go faex neix luemj lai, dwg mwngz caengz rox baenzlawz bin.” Duzmeuz henj mbouj fugheiq naeuz: “Couh dwg go faex neix luemj lai, mbouj saenq mwngz heuh daeggo bin.”

Duzmeuz raiz hag gij yiengh

daxmeh bin faex, gaem maenh gij ganjfaex, yunghrengz mbat yat couh bin hwnj lo. Duzmeuz meh yawj coh duzmeuz henj.

Duzmeuz henj yawjraen le, naj-hoengz lo. Duzmeuz meh doiq de naeuz: “Cax rae h baengh roengz rinbaenz, caixhangz baengh gaenx guh. Hag bonjlingx mbouj dwg miz coengmingz ndwi couh hag ndaej, lij aeu nyinhcaen, gaenx guh.”

Daj seizhaenx hwnj, duzmeuz henj nyinhcaen hag bonjlingx, caiq hix mbouj faensim lo.